

欽定剿平粵匪方略

欽定勦平粵匪方略卷七十三 癸丑年

十二月十六日

丙戌

舒興阿奏言 臣前聞廬州被

圍緊急隨督兵由潁壽一帶水陸前進屢具公牘信函知會江忠源囑其堅守並密爲約會以備官兵夾擊因未接見回咨實深焦灼 臣於壽州起程時派已革總兵郝光甲並前任雲南普洱鎮總兵楊青鶴酌帶官兵三千名作爲前隊

當令由郡城西北面分爲兩路旋探旋進嗣臣

於初四日行抵距廬州四十里之吳山廟適江忠源差兵二名縋城送到覆函據稱賊匪圍困七門急待援兵等語查郝光甲所帶前隊官兵已據報稱初五日可抵郡城水西門高橋地方擇地紮營楊青鶴所帶之兵計亦陸續起到前在店埠之已革臬司張印塘現移岡子集聞信

趕至見面約期隨同進剿卽於次日先攻水西門逆匪所紮木城郝光甲親率都司馬榮等帶官兵五百餘名攻打西面遊擊富昌等帶官兵五百餘名攻打東面千總段作棟等各帶兵勇往來策應夾擊張印塘派令遊擊何朝亮知州李登洲等共帶兵勇八百名由中路前進楊青鶴督率署遊擊吉蘭泰等分帶官兵在土梁左

右埋伏以備接應該員等約定後卽於初六日  
已刻出隊兩路直撲木城逆賊望見併力出迎  
我兵奮勇攻擊前隊先至木城攀援直上逆賊  
極力抗拒木城外賊匪見官兵逼近紛紛逃竄  
時第四五座木城內賊衆分爲兩路擁出抄襲  
後路我兵恐被圍裏立時回擊守備包紀功等  
各帶伏兵齊起分投截殺賊匪恃其人衆死力

迎拒維時何朝亮等所帶兵勇亦趕至助攻自  
已至酉鏖戰四時之久賊勢不支紛紛竄回北  
門木城堅拒不出統計官兵殲賊約八百餘名  
生擒一名奪獲旗幟刀矛多件張印塘派出兵  
勇轟斃賊匪百餘名現在臣已帶兵行抵距郝  
光甲等營五六里之岡子集安營查該官兵於  
初次抵營開仗尙屬奮勉惟賊數衆多城垣周

圍約有三十七八里甚屬遼闊七門外俱有木  
城土壘此擊彼應勢甚猖獗必須先攻破一二  
木城以便與郡城西面官亭駐紮之總兵音德  
布候選同知直隸州劉長佑兵勇聲勢聯絡並  
與郡城消息相通方可得手現在趕緊設法會  
剿以期迅解城圍

舒興阿又奏言臣初四日在瓦罕途次准袁甲

三和春咨送摺稿內稱臣已行抵壽州西路空  
虛太甚潁州爲皖楚豫交界適中之地擬將臣  
所帶之兵分撥三千名交和春及江忠源分帶  
調遣並請

飭臣帶兵千名折回潁州防賊西竄楚豫惟臣先因廬  
州被圍緊急帶兵趕緊赴援現已行近廬郡正  
在督飭官兵攻剿豈能又令折回是袁甲三等



擬令臣折回潁州防堵殊覺窒礙難行

舒興阿又奏言聞副都統常清現帶官兵來廬  
赴援前起官兵已行抵定遠縣查廬郡惟東北  
面無兵防守該逆匪一經擊敗勢必伺隙奔逃  
亟應撥兵堵剿臣現已飛函知會常清卽由定  
遠直趨廬郡北面四十里之店埠地方扼要駐  
紮以遏逆匪北竄之路並函催和春趕緊由定

遠前來該處協力堵剿不使逆匪北竄又於初  
八日編修李鴻章等來臣行營謁見據稱聞大  
兵來援廬郡該紳士等所有先經團練之壯丁  
今願自備口食隨同官兵擊賊自效臣查該紳  
士深明大義當卽面爲獎勵並令其作速調集  
壯丁聽候約期隨同進剿

舒興阿又奏言臣由水路行至距正陽關之八

里塚地方查知正陽關係在赴六安州迤南河  
內前赴壽州並不由關經過遠望形勢商船雲  
集當卽派員察看該處係水陸通衢防守誠不  
容緩非駐兵數百不能遏賊北竄適署壽州知  
州金光飭來見詢以地方情形頗爲熟悉因與  
面籌正陽關防守事宜據稱正陽關係該州所  
屬本爲緊要之區擬俟照料官兵過境後卽帶

壯勇數百名會同通判督飭本關團勇千餘名  
妥爲布置臣沿途訪聞該署知州緝盜得力保  
衛有方前次賊擾臨淮鳳陽壽州得以安堵實  
賴該員防守之力當卽札委金光飭酌帶練勇  
前往正陽關擇要設防以扼賊由六安北竄之  
路

同日和春袁甲三奏言臨淮爲南北咽喉第一

緊要門戶防堵實不可緩惟廬州尙未解圍儘  
該逆大股盡撲廬州尤爲萬分喫重以大局而  
論自應先其所急是以臣和春卽於十二月初  
二日督帶兵勇自宿起程初五日行抵臨淮初  
六日於河之兩岸親加歷勘查得臨淮水陸要  
道遏賊北竄正當其衝現在該處防守止有壯  
勇五百名萬不可恃因思漕臣福濟帶兵二千

餘名已自清江起程無論水陸均須經過臨淮  
該漕督來皖督勦本在江忠源抱病之日廬州  
大局無人支持是以

特命該漕督前來近日廬郡消息漸佳撫臣病已全愈  
各援兵亦陸續到齊臨淮喫緊非常應請

旨飭令福濟卽行駐守臨淮旣與南路聲息相通並可  
扼守北竄要路均奏入

上命軍機大臣傳諭舒興阿江忠源和春曰舒興阿奏帶兵行抵合肥縣岡子集紮營所派前隊楊青鶴郝光甲等進仗業已獲勝又據和春等奏稱業已帶兵前赴廬州此時諒可趕到現在廬郡城外援兵大集舒興阿與和春務須合力進勦並知照江忠源內外夾擊以期迅解城圍該督另片奏行近廬郡不能折回潁州並令金光飭扼守正陽關自係實在情形卽

著照所議辦理

上又命軍機大臣傳諭福濟袁甲三日現在廬州城外  
援兵雲集聲勢益壯賊匪被勦奔突難保不北竄臨  
淮該處爲南北咽喉現在兵力單弱且無大員統帶  
設有疏虞所關匪細著福濟於行抵臨淮時探明廬  
州賊匪如已被勦窮蹙城圍已解自當扼守臨淮以  
防餘匪紛竄如廬州情形緊急仍應帶兵接應不可



拘執並著與舒興阿和春袁甲三悉心酌度勿誤事  
機

上諭內閣曰此次接仗兵勇甚爲奮勉舒興阿初抵安  
徽卽獲大勝實足振軍威而寒賊膽現在和春計亦  
馳抵廬州著舒興阿與該提督嚴飭鎮將兵勇並與  
江忠源合力內外夾攻迅解廬郡之圍掃除羣醜毋  
稍遲延

同日向榮奏言初四日寅刻派已革提督福興  
遊擊張國樑攻朝陽門之左總兵吉順明安泰  
等攻朝陽門之右總兵秦定三德安等從中路  
直攻朝陽門賊營另派兵勇先赴西善橋協同  
團練繞攻水西門遙分賊勢並派革員鄧紹良  
帶領兵勇伏於明陵之左豫防賊由太平門襲  
我之後署將軍蘇布通阿往來督催是日臣親

督官兵先行開放大礮聲勢震盪各兵勇乘勢  
分路直前城頭賊衆並朝陽門外賊營槍礮如  
雨我兵銳氣百倍搶越城濠架登雲梯該逆火  
彈輒石齊下我兵奮不顧身極力仰攻忽明陵  
山後擁出逆匪約五六千人勢甚兇猛當經伏  
兵迎頭截擊一面加派參將傅振邦遊擊鮑雲  
翥等帶兵助戰該逆愈集愈衆復經遊擊全玉

貴等橫衝賊隊斬殺無算該逆前隊抵敵不住紛紛潰散後隊猶併力拒敵我兵乘勢搶上山梁復又斬殺數十人該逆始全股奔回太平門我兵越山追殺殲擒極多是日自寅至巳鏖戰四時殺斃賊匪約三百餘名生擒十一名各兵勇實屬奮力用命但賊拚死堅拒以致未能得手臣惟有激勵將士相機籌勦以期迅圖克復

奏八報

聞

十七日

丁亥

崇綸奏言督臣吳文鎔因奉

旨出省督戰欲再撥防城官兵四千名親往進剿共計  
先後撥兵七千餘名僅留守城兵六千名祇得  
會咨將軍仍調荊州滿兵二千名來省接濟臣  
與司道各員同向督臣籌商遵

旨先遣臬司唐樹義帶領舟師前往攻剿俟餉力兵力  
稍可騰挪督臣再行親往庶防剿兩得其宜督  
臣不以爲可伏思軍務至重隨時變遷自當廣  
益集思以期妥協無如督臣任性偏執不聽人  
言一味拘泥以致百姓憤怒弁兵互調各不聯  
屬不得不據實奏

聞至督臣統師出省所有防守各要務臣惟有竭盡心

力妥籌辦理奏八

上命軍機大臣傳諭吳文鎔崇綸曰崇綸前以吳文鎔  
閉城坐守叅奏此次奏報各情何以自相矛盾殊堪  
詫異現在逆匪雖多半下竄皖省若被我兵勦捕緊  
急難保不由江路回竄楚北吳文鎔著卽趕緊渡江  
親赴黃州督勦並著嚴飭唐樹義等迅速前往水陸  
會勦其省城內外防守事宜仍責成崇綸嚴密布置

毋稍疏虞至所調荊州駐防兵二千名著卽催令迅速趕到協同防堵

十八日

戊子

琦善奏言查賊踞儀徵已逾一月臣

正派參將鞠殿華等帶兵於本月初九日馳往  
攻剿適於前一日經儀徵縣知縣都榮森等分  
帶兵勇撲入城內殲賊多名並擒獲奸匪八名  
初十日卯刻江口之賊紛紛上岸接應竄入南



門鞠殿華等卽整隊前進該地方文武亦隨同  
進攻由東北二門攻入城內將城內之賊奮力  
剿殺並將所有餘匪驅出南門外從內河追至  
外河用銅礮擡礮擊斃賊匪數百名落河淹斃  
者不計其數生擒八名奪獲旗幟器械多件自  
卯至申悉將城市關廂賊匪剿逐無遺忽報老  
河影地方又有賊匪數百人登岸肆擾復經滿

漢官兵分投堵剿追至江邊擊斃賊匪二百餘名奪獲大小船十五隻當卽焚燬餘匪悉乘舟入江臣於是夜酌帶弁兵暨西安馬隊親赴儀徵次日徧查該縣城內外一律肅清但能實力扼守卽以杜賊北竄天長之路至三汊河樸樹灣等處之賊初七日用礮對官兵營盤轟擊我兵開礮擊退斃賊多名瞿騰龍德與阿督率馬

步隊分三路迎敵另揀精兵徑赴河干焚燬賊船十餘隻賊匪棄營驚竄官兵追殺數百名溺死無算踏平賊營十三座儀徵河內凍青鋪東西石人頭等處一律肅清初八日黎明臣琦善約同陳金綬率領將備由灣頭循運河東岸進攻瞿騰龍德興阿亦渡河來會另派將弁由三汊河西岸夾攻行至八里鋪賊見官兵卽開礮

抗拒我兵亦施放銅礮擡礮連環轟擊斃賊無數當將賊船轟退賊房燒燬初十日探得賊匪又棄營南遁至八里鋪復經瞿騰龍德興阿督兵過河追至四里鋪地方將兩岸賊房悉行焚燬斃賊多名又將河內賊船燒燬兩隻餘船揚帆南遁我兵乘勝追殺直抵瓜州維時天色已晚敵隊回營復探得瓜州賊營之下游已偏江

日賊船七八百隻帆檣林立既不敢入內河迎敵又不遽向大江開行不知其意欲何爲官兵並無船隻無從火攻惟有由陸路相機進剿奏  
入

上命軍機大臣傳諭琦善陳金綬雷以誠慧成曰前踞揚城之賊既已逃竄一空現在又以收復儀徵空城入奏賊勢欲往何處竄擾均未聲敘該逆全股蟻集

瓜州分擾三汭河等處琦善陳金綬若但知株守一隅任賊肆擾仍恐顧此失彼所有三汭河以下至瓜州一帶著琦善與陳金綬妥速籌商親督官兵前往堵剿陳金綬此時是否與琦善分路進兵抑係同在一處亦未詳敘其天長六合一路尤須揀調精兵派員扼守並著琦善迅籌布置仍嚴飭武慶於浦口一帶加意防守以固藩籬

上諭內閣曰此次琦善等督兵攻擊儀徵雖經克復而瓜州之賊尙未遠颺該大臣務當乘此聲勢將瓜州及三汊河盤踞各匪悉數勦除毋留餘孽

同日江忠源奏言初一日夜水西門月城外所紮營盤因逼近賊營該匪連擲火罐其賊營之在高坡者又日夜用槍礮對城轟擊時城上守垛皆新集之勇並無槍礮因卽撤回城內賊遂

於營內開挖地道其大西門月城賊原挖三洞  
我兵從內迎掘二十八日尙未掘通隨被該逆  
點發一處當經駐守該門之湖南舉人鄒漢飭  
等登時搶護初二初三兩日我兵連破兩洞該  
逆伎倆已窮先是初一初二初三等日先後接  
據音德布劉長佑戴文蘭等函稟知己分帶兵  
勇先後行抵廬境音德布已紮營西城外二十



里劉長佑戴文蘭到日復與音德布進營西城  
外之十里鋪初四日音德布劉長佑戴文蘭等  
三路進攻臣當於各門派兵分路縋城接應牽  
制賊勢時劉長佑等所帶各勇併力直前先燬  
賊營外哨棚二十餘座隨用火彈拋入賊營登  
時火起各勇乘勢撲殺該匪紛紛逃竄槍斃二  
十餘名生擒三名時西南賊營忽出數百人衝

突南路壽勇抵敵不住復經劉長佑等督率兵  
勇奮力擊殺賊始敗退是日水西門所派兵勇  
由紫金堦縋城而出斬獲長髮賊首級一顆槍  
斃賊匪十餘名得勝門一路經臣派令參將崇  
禧等統帶兵勇直搗賊巢燬營五座斬獲長髮  
賊首級三十顆生擒二十七名槍斃者一百餘  
名北門一路經外委黃占超等帶勇縋城謀燬

賊營斬獲長髮賊首級一顆槍斃十餘名其餘  
各門約斃賊匪五六十名初五初六等日城內  
外合力夾擊各路均有斬擒賊見援兵四集城  
內復更番接應不敢近撲城門惟於水西門晝  
夜攻擊城內日受礮子百數十顆該逆慣用地  
雷臣雖嚴密豫防而水西大西兩門常有耽耽  
思騁之意臣於萬分焦急之時勉強鎮靜安定

人心現在咨會督臣舒興阿並札飭張印塘劉長佑等令其步步爲營漸逼城下迅解重圍

江忠源又奏言前奉

諭旨飭令舒興阿分撥陝甘官兵交和春統帶仰見

聖主知人善任莫名欽感查和春自賊起廣西以來轉戰數年身經百戰賊情熟悉謀勇兼優目前提鎮大員無有出其右者上年賊竄湖南經賽尙

阿派令總統諸軍屢挫兇鋒賊眾畏憚因程喬  
采頻掣其肘徐廣縉甫到衡州又將其總統革  
去是以未能成功迨後賊勢日熾該署提督每  
對人言輒爲流涕忠義之氣歷久彌著現在廬  
州城外援兵雲集急需久歷戎行調度有方之  
員以資統制戴文蘭業經 臣調入城中音德布  
實非統御之才楊青鶴郝光甲初六日一戰 臣

在城上見其布置一切似於戰陣機宜尙未熟  
悉若得和春總統城外各路援兵鎮將以下均  
受節制必能迅解重圍遏賊北竄可否仰懇

天恩飭派和春總統城外諸軍節制各鎮之處出自

聖裁奏入

上命軍機大臣傳諭舒興阿江忠源和春曰此時廬郡  
尙未解圍亟應迅圖勦辦和春由宿州前進赴援計

集之身長丁田卷一三  
已趕到舒興阿所帶官兵著遵照前旨交和春統帶  
與江忠源勦力同心爲內外夾攻之計舒興阿著卽  
將廬州後路扼守事宜相度酌辦並就近與福濟袁  
甲三互相知照兼可以壯和春前路聲威

上諭內閣曰現在各路援兵雲集舒興阿和春均抵廬  
州所有攻勦事宜自應專責總統大員以資得力和  
春久歷戎行謀勇兼著卽著總統城外諸軍無論何

路赴援官兵悉歸節制其有不遵調遣者卽以軍法從事舒興阿自穎亳一帶赴援沿途險要情形均經親歷著卽妥籌扼守事宜以防餘賊竄逸其城內防守事宜卽著江忠源督同戴文蘭嚴密布置以期聲勢聯絡迅解城圍

江忠源又奏言初八夜據報楚北賊匪由蘄水竄入英山揚言欲入六霍等語查英山北通光



固東河六霍臣已飛咨河南撫臣趕緊設防並  
咨督臣舒興阿就城外酌撥兵勇前赴六安防  
堵臣身在圍城未能先事豫防應請

旨將臣交部嚴加議處奏入

上諭內閣曰江忠源奏據報湖北逆匪竄入英山自請  
嚴議江忠源現在廬州防守雖於所屬地方未能兼  
顧究屬不能先事豫防著交部照例議處

十九日己丑勝保奏言查葡萄窪等處偏隄紮營

距賊營既近又爲靜海獨流往來咽喉要路該  
逆情急每乘夜更番激擾均被官軍擊回本月  
十六日臣親至新築營壘相度地勢令各營分  
路設伏以待仍商同德勒克色楞督帶馬隊列  
於大營門外以作接應臣於初更時親至羅古  
莊以南忽聞一片喊聲逆賊擁出約有數千分

三路撲來臣卽令正定宣化步隊各兵認取白  
晝所指各路從南面擊殺固原西甯河州各官  
兵從北面截勦並令魁福帶黑龍江馬隊在北  
面步隊以外托雲保帶吉林馬隊在南面步隊  
以外分路抄截又派總兵孔廣順帶川楚勇由  
東壓下臣親帶天津河南各勇及小隊官兵一  
齊喊殺賊始猶勉強拌命溷戰繼因傷斃過多

又見四路兵勇同時抄擊人馬雜踏奪路狂奔  
拋棄槍械火藥等件不計其數其靜海前來接  
應賊匪三四百名亦被吉林蒙古馬隊追殺退  
回統計斃賊五六百名查該逆情急無路見我  
兵紮營截堵遂乘夜詭出屢擾我兵今番受此  
痛創我兵軍威益振膽氣愈壯臣俟紮住營盤  
卽當剋期進剿迅殄逆氛

勝保又奏言逆匪於十六日夜被我兵痛創後  
又因礮臺連日用大礮向賊壘轟擊斃賊甚多  
逆衆幾無立足之地於十七日夜潛在隄岸築  
壘避礮臣立即調齊隊伍親至葡萄窪令總兵  
孔廣順督帶川勇在前黑龍江馬隊在北吉林  
馬隊在南其餘官兵分隊在後接應並督令天  
津練勇與各兵勇一同直前奮擊槍礮齊施逆

衆傾巢出拒臣嚴督隊伍用神威礮四尊連向  
逆衆轟擊賊屍隨倒隨拖拌死抗拒忽靜海逆  
匪千餘自南隄來時已天明臣急分兵迎敵仍  
自帶小隊並天津練勇督戰而賊之來勢甚猛  
我兵連放神威礮數時之久礮身已熱因見賊  
偏近下藥太多以致震裂臣旋即督兵轉至新  
營誘賊離巢該逆大股果分路撲來擁至營旁

地勢稍狹逆衆攢簇稠密之時臣急令開礮轟擊每礮斃二三十人逆衆黃旗紛紛倒地賊知有伏踉蹌逃回適所調駐守楊莊戶之正定西甯河州官兵趕到橫衝截殺生力新兵勇氣百倍馬步各隊乘勢掩殺齊用遠環槍礮追擊沿路撿斬甚多壓至賊壘隄岸之上德勒克色楞木在梁王莊前防賊抄營因臣督兵鏖戰爲時

已久隨督蒙古馬隊前來接應達洪阿病尙未  
愈力疾乘馬督帶巡捕技勇兩營官兵亦來策  
應維時賊已狂奔回巢我兵因連日以來守護  
礮臺新營晝夜勤苦此番自丑刻出隊直至午  
刻計共斃賊四五百名斬賊首級十餘顆奪獲  
擡槍二十餘桿該逆勢已窮蹙所患兵力尙單  
每遇有機可乘輒苦無兵可撥一俟瑞昌崇恩



之兵到靜海後善祿帶兵前來兵力稍厚即可  
橫紮營盤盡力攻勦奏入

上命軍機大臣傳諭勝保德勒克色楞曰逆匪占踞獨  
流靜海以來該大臣疊報賊勢窮蹙已極朕日望捷  
音並予以限期乃仍以小勝塞責能否剋期掃蕩尙  
無把握務須激勵將士埽穴擒渠以清畿輔又據勝  
保奏十七日勦賊情形現在逆匪勢窮情急新營偏

近賊壘尤應加意嚴防毋稍大意

上又命軍機大臣傳諭瑞昌崇恩曰逆匪占踞獨流兩  
月有餘尙未剿滅必須厚集兵力以期迅速殲除旣  
據勝保奏稱知會瑞昌崇恩迅卽帶兵來直協剿想  
已起程現在靜海需兵甚亟著瑞昌崇恩飛卽督帶  
兵勇兼程前進直赴靜海聽候勝保調度毋稍遲延  
上諭內閣曰逆匪連日撲出經我兵疊次攻剿獲勝賊

勢窮蹙已極著勝保德勒克色楞迅卽督飭各路將  
弁兵勇合力兜擒毋任竄逸達洪阿力疾督兵以知  
愧奮著賞還家產如能始終奮勉無難再沛恩施

同日江忠源奏言賊匪於十一日五更率眾四  
五百人大張聲勢先攻小東門經駐守該門之  
知府陳源堯及巡查該門之都司和寬帶廣東  
勇之守備程智泉督率兵勇二百餘名奮力抵

禦臣隨添派楚勇三十名飛往協剿並以逆情  
詭譎慮其聲東擊西諄囑都司馬良勳戴文蘭  
加意嚴防維時小東門賊尙未退水西門月城  
迤北城堞忽然轟裂八丈有奇黑煙噴湧昏不  
見人缺口兵勇衣被火燃躍入護城河內徧身  
皮膚如剝其餘兵勇始雖奮力攔截及見火光  
兇猛城身搖撼紛紛從馬道滾下惟馬良勳戴

文蘭站立缺口抵死不動臣目擊情形計無生  
理親督兵勇冒煙衝上該逆乘勢盞擁搶入一  
穿黃衣賊目手執大旗當先直上馬良勳以身  
迎敵該賊目用長矛向馬良勳胸膛直刺馬良  
勳以手格之隨以長矛迎面刺死該賊目滾落  
城下旋又手刃一賊其旁賊之蟻附者復經戴  
文蘭手刃數名臣復督率兵勇施放槍礮拋擲

火彈轟斃賊匪百餘名受傷者無算該逆旨死  
不能衝上乃少退卻其小東門賊匪經陳源堯  
和寬程智泉督率兵勇並臣派去楚勇奮力殺  
賊四五十名我兵乘勢從營內抄出城根又跟  
蹤追斃十餘名是日賊勢兇猛安危在呼吸之  
閒仰賴

聖主威福得以化險爲平臣現仍加意嚴防並咨會督

臣舒興阿等剋日進勦以圖迅解重圍奏入

上命軍機大臣傳諭江忠源和春曰逆匪屢次用地雷轟城經該撫督率將弁兵勇槍護轉危爲安江忠源謀勇兼施深堪嘉尙現在和春帶兵計已趕到廬郡已有旨令其總統各路赴援官兵迅解城圍該撫卽與該提督激勵將士內外夾攻總以及早解圍爲要昨據奏賊匪由蘄水竄入英山揚言欲至六霍該處

北通光固最關緊要江忠源雖在城中勢難兼顧仍當力籌全局隨時知照舒興阿福濟相機援應萬不可任賊北竄

上諭內閣曰此次廬州逆賊用地雷轟陷城堞勢極危險江忠源力保危城躬親戰陣督率將弁兵勇併力捍禦實屬忠勇可嘉之至著賞給霍隆武巴圖魯名號馬良勳戴文蘭力扼轟陷城牆缺口手刃逆匪驍



勇異常均堪嘉尙馬良勳著賞給卓哩克泰巴圖魯  
名號戴文蘭卽著以副將補用現在大兵雲集著江  
忠源督率兵勇與和春等內外夾擊迅解城圍盡殲  
醜類毋稍遲延

二十日 庚寅 慧成奏言查桂花莊施家橋一帶賊

匪均退至瓜州駐紮亟宜相機攻剿已飭前派  
駐守運河西岸便宜門總兵多隆武帶領山東

弁兵先行移營前進 臣等亦次第向前移紮務  
將瓜州賊匪殲除以期肅清江北惟逆黨自揚  
城敗竄後運河東西兩岸賊情甚爲渙散並無  
鬪志前由金陵駛至瓜儀船隻亦多開往上游  
詢據逃回難民供稱賊匪欲由金陵上游東壩  
地方窺伺蘇杭等語 臣已飛咨大江南北兩岸  
附近金陵省分加意嚴防以免竄擾奏入報



欽定勦平粵匪方略卷七十四 癸丑年

十二月二十一日 辛卯 琦善奏言據六合縣知縣

溫紹原稟稱本月十一日卯刻忽有賊船數隻  
自南岸觀音門駛至六合通江集壩外蠶擁登  
岸焚燒民房後尙有賊船多隻自觀音門陸續  
開來當經該縣偕守備秦懷揚等馳往分途兜  
勦殺斃多名並有在籍檢討徐蘄等招集民勇

助陣賊匪驚遁回船開往南岸在後各船亦俱  
駛回觀音門又查浦口地方有總兵武慶等率  
兵扼守屢經擊退賊船防堵最爲得力茲據報  
稱本月初六日有賊船六隻駛至三江口地方  
隨卽督兵擒拏並拋擲火藥口袋燒燬船隻賊  
匪溺死者無數生擒賊匪三十七名奪獲賊匪  
書信等三封僞木印一顆槍礮多件提訊獲賊

僉稱自安慶奉賊渠楊秀青僞令調回金陵內  
有僞將軍提督指揮監軍各一名初七日又據  
派出官兵在觀音門地方截獲賊船六隻賊匪  
四十三名據供奉楊秀青僞令赴鎮江瓜州一  
帶臣查逆匪書信內稱揚城攻勦緊急萬不可  
守不如固守瓜州又有擬在瓜州添紮三營之  
語賊匪詭詐百端此信或係真實賊情其儀徵

地方自克復縣城後關廂一帶均稱安謐臣添  
派總兵李志和等帶兵一千一百餘名前往駐  
守據地方文武等稟報江心時有逆船往來老  
河影等處尙有逆船停泊江邊並未上岸滋擾  
江北各口岸均尙肅清至瓜州賊匪業已遁至  
江濱修築輒城土城意圖負嵎抗拒瞿騰龍等  
連日乘勝追剿直抵瓜州因賊營大礮連環施

放一時未能得手現在陳金綬移營三汊河東岸之桂花莊總兵多隆武在養生堂駐紮臣已疊次函囑慧成移營前進臣查除三汊河之外尚有儀徵河道勢須兼顧擬至西岸適中地方駐紮以便調度奏入

上諭曰賊匪詭詐多端所獲逆書不可盡信瓜州逆匪情形動靜若何速查馳奏



二十二日壬辰和春奏言臣於十二月十四日行

至合肥梁園尙未准舒興阿撥兵前來差探廬  
郡賊勢雖經我軍攻勦疊獲勝仗而賊匪甚衆  
其東南面賊匪尤多此二處緊接北路店埠正  
當其衝並無官兵堵禦甚屬空虛督臣舒興阿  
帶領官兵五千名業已到廬在於西北面之岡  
子集紮營已革臬司張印塘帶領兵勇原在店

準防堵現已移紮阿子集與舒興阿營盤相近  
此外尙有總兵音德布並江忠源之弟江忠濟  
共帶兵勇四五千名是西北面兵勇約有一萬  
餘名查逆匪現在大股圍攻廬城東南面爲北  
路咽喉實屬喫重必須厚集兵力趕緊進剿一  
面在於店準扼要堵禦使該逆無從北竄以冀  
迅解重圍惟臣所帶之兵僅止千名於十五日

卽由梁園繞道馳赴岡子集與舒興阿面商撥  
兵堵剿舒興阿以所帶官兵僅敷調遣不能分  
撥婉商再三未能允行並令臣前赴西面以就  
兵力伏思店埠本屬北路門戶且廬城東南面  
賊匪甚多自當加意嚴防始可遏其北竄臣旣  
到廬未便以兵力過單置要隘於不顧因聞都  
統常清帶有馬隊七百餘名由定遠前進卽經

先行飛咨紮駐店埠茲臣由岡子集折回卽帶  
同密雲熱河兵馳赴店埠紮營堵禦並飛催參  
將劉玉豹趕緊帶兵來廬設法進剿但兵力仍  
形單弱查現隨漕臣福濟之參將嵩瑞帶有山  
東官兵四百餘名此時福濟旣在臨淮防堵所  
有此起官兵業經飛咨趕緊派撥馳赴店埠又  
已革臬司張印塘原帶兵勇千餘名現在西面

亦已飛調迅速前來再臣在鎮江原帶之湖南三四五起官兵七百餘名請

言迅速向榮卽令鄭魁士星速帶領兼程來廬以便攻剿如此各路抽調若趕緊到防則兵力稍厚自當迅速進攻以解重圍

同日慧成奏言接據探報金陵賊營惟雨化臺爲最大初四日賊來劫營至紫金山一帶與官

兵相遇殺賊甚多僞王府於是日被天火焚燒  
初五日官兵攻打賊營逆匪施放火箭反自燒  
其營門有被掠百姓乘勢縱火斃賊無數等語  
查前次逆匪初起時其燄甚熾民情頗被煽惑  
目下賊勢漸散民心漸固臣當安撫百姓以收  
民心而鼓衆志均奏入

上命軍機大臣傳諭舒興阿和春曰和春奏行抵合肥

梁園地方察看西北面兵勇約有萬餘而廬州東南面逆匪最多又爲北路咽喉必須厚集兵力方能由店埠一帶進剿現在該提督帶赴店埠之兵僅止千餘名加以張印塘原帶兵勇亦止千餘名此外催調之兵又恐緩不濟急若再稍有稽延廬州城內餉乏力疲深爲可慮著舒興阿卽遵前旨迅將所帶官兵分撥二三千名交和春統帶卽由店埠趕緊赴剿如

所撥將弁或有託故推諉者卽著和春查明以軍法從事廬州赴援之任朕已專責和春儘該提督有意遷延致誤事機自難逃朕洞鑒若各路帶兵官員意存掣肘亦不能曲爲寬宥也

上又命軍機大臣傳諭向榮曰現在廬州城圍未解正當勦辦喫緊之際所有和春前在鎮江原帶之湖南三四五起官兵七百餘名素稱得力且爲該提督親



信之兵著向榮卽飭已革副將鄭魁士統帶起程馳赴廬州交和春調遣以資攻剿連日金陵進攻情形未據奏報本日慧成奏探稱金陵賊營惟雨花臺最大初四日賊至紫金山與官兵相遇殺賊甚多僞王府被天火焚燒初五日官兵打仗賊放火箭反自燒其營門百姓乘勢縱火斃賊無數等語如果屬實大有可乘之機卽著妥速籌辦據實奏報

二十四日甲午勝保德勒克色楞奏言該逆自十

七十八日兩次受創後欲阻我兵進攻紮營決隄放水葡萄窪一帶漫溢甚寬新築營盤水已數寸現督飭兵弁挑土鋪墊設法宜洩攔禦因一面傳令於靜海上游西岸決隄放水灌入下西河又派員至靜海東岸相度地勢挖決隄埂使水注東南既可杜其竄路又可殺其水勢現

在瑞昌崇恩之兵陸續已到靜海善祿日內卽  
可抽帶官兵千餘名會同臣等分兵駐紮新營  
合力進剿臣勝保與德勒克色楞連日審度地  
勢靜海獨流相距止十八里有奇而周圍地方  
遼闊四處皆通又值天寒水凍恐該逆窮蹙踏  
冰潛竄是以凡有要路俱已嚴密設防臣勝保  
屢次跪讀

嚴旨慚恨無以自容苟有一隙可乘誓必滅此朝食至  
軍營一切情形臣勝保雖屢陳之奏隨而其辦  
理棘手傳聞異辭之處有非筆墨所能盡宣者  
當此功虧一簣之時或宜力攻或宜圍剿措置  
稍有失當全局成敗攸關善祿日內到營仰懇  
皇上准令臣德勒克色楞額兼程來京將其中委曲詳細  
情形據實面陳並有密奏機宜上乘

宸謨卽行回營遵辦更於軍務

國事兩有裨益奏入

上命軍機大臣傳諭勝保德勒克色楞曰逆匪占踞獨  
流靜海將及三月該大臣等此次所奏賊匪情形仍  
以慎重爲詞一切措置全無把握本日據舒與阿奏  
廬州於十六日夜被賊攻陷巡撫江忠源殉難該處  
爲南北咽喉賊勢如此披猖若不將獨流之賊趕緊

勦滅設廬州大股乘間北來時勢將不可問著該大臣設法進攻剋期掃蕩所請令德勒克色楞來京密奏機宜之處卽著迅速來京

勝保又奏言十八日接仗管帶職位章京黃周賓身受槍傷卽時陣亡情殊可憫請

旨飭部照例議卹奏入

上諭曰黃周賓著照例議卹覽此彼日之進仗失職無

疑因何掩飾入奏僞爲炸裂殊屬可恨勝保出京甫  
及一年何沾染習氣若是之深著據實明白回奏

同日舒興阿奏言十六日夜四鼓時聞廬郡城  
內礮聲不絕總兵楊青鶴已革總兵郝光甲等  
帶領將備官兵出隊救援臣營亦卽派兵接應  
因道路橋梁已被逆賊拆毀窆斷又係黑夜之  
間中有賊營阻隔槍礮齊施該逆拚死抵禦相

持不下另股仍在水西門外用地雷將城轟裂  
數丈當經撫臣督飭兵勇卽時補塞距該匪復  
於南門小東門等處用長梯數百架爬城並由  
城外紛投火彈火毬致守城兵勇慌亂逃散雖  
經撫臣督飭弁兵迎頭截擊殺賊數百名乃該  
匪愈集愈多我兵抵擋不住天將明時城已失  
陷逃出民勇均言撫臣在水西門內禦賊陣亡



據署臬司張印塘總兵音德布報稱情形大略  
相同並據音德布稱撫臣之弟六品銜江忠濟  
帶領楚勇千餘名同時救援無能爲力臣聞信  
之下五中焦灼憤恨萬分查撫臣江忠源忠勇  
素著守護郡城一月有餘力疾辦公晝夜不形  
疏懈官民無不感戴無如城垣遼闊內外兵力  
均單竟至城亡遇害情實可憫應否從優議卹

之處出自

恩施

同日和春奏言臣於十七日馳赴店埠將現帶之兵千名同副都統常清所帶馬步隊七百餘名先在店埠紮營防堵一面設法進剿乃正在窰築營壘間忽聞逆匪用地雷轟陷城垣廬郡失守臣查此股逆匪本由江西擊敗竄至皖省

擾陷安慶占踞舒桐二縣又復直撲廬州因城外民房未經燒燬被該逆偷挖地道致城失陷亟宜趕緊圍攻以冀克復且廬郡爲北路咽喉堵禦尤爲喫緊必須添派官兵合力撓勦查揚州業已收復賊匪退踞瓜州該處兵力尙厚可以抽調又現在金陵帶兵之總兵秦定三屢經戰陣素稱勇敢請

旨飭令揚州統兵大員趕緊酌撥官兵數千名作速來  
廬並請

諭知向榮派令秦定三隨帶官兵一二千名星夜前來  
其前調湖南官兵亦卽催令迅速起程以資合  
力攻勦迅圖克復均奏入

上命軍機大臣傳諭和春舒興阿曰前因廬州情形緊  
急諭令舒興阿和春前往督勦並以和春熟悉賊情

特命總統諸軍惟兵力較單合舒興阿酌撥官兵二  
三千名俾資調遣乃該督既不肯抽撥又不能督率  
鎮將竭力攻勦以致郡城被陷盡臣捐軀實堪痛恨  
江忠源忠勇素著屢立戰功朕方欲畀以勦賊重任  
今竟因援兵不力城陷陣亡覽奏之下悼惜殊深和  
春現在進紮何處所有城外各路兵勇一萬餘名卽  
著統歸和春管帶調遣福濟所帶兵勇計日亦可趕

到兵力尙不甚單江忠源所帶兵勇著卽趕緊收集  
無令渙散江忠源之弟江忠濟等所帶之勇亦必得  
力並著和春酌量調撥加以激勵以備助勦舒興阿  
係專派統兵赴皖大員旣已行抵廬郡尙不趕緊攻  
勦乃擁兵自衛坐誤事機本日降旨革職令其帶罪  
自效若再不知奮勉著和春奏明卽於軍前正法和  
春膺茲重任務當與福濟暨諸將士合力同心迅圖

克復若再遷延時日致賊久踞廬州或乘間北竄惟  
和春是問

上又命軍機大臣傳諭琦善向榮曰廬州失陷該處爲  
南北咽喉最關緊要和春所帶兵勇甚形單弱舒興  
阿雖帶兵數千亦恐不能得力必須添派重兵以資  
剿辦著琦善於揚州軍營撥兵四千名派薩炳阿管  
帶向榮撥兵一千名派秦定三管帶卽日馳赴安徽

統歸和春調遣逆匪現踞瓜州揚州情形較緩金陵  
久未克復逆匪已紛擾安徽江北情形更爲喫緊勢  
不能不先其所急著該大臣等卽派該員等星速帶  
兵前往不准片刻遲延

上又命軍機大臣傳諭楊以增長臻張亮基英桂曰逆  
匪攻陷廬州勢益鷗張深恐乘機北竄前經疊次諭  
令楊以增等嚴防河岸此時情形更爲喫緊尤當嚴



密防範勿稍大意其應如何擇要駐兵堵剿之處著楊以增長臻張亮基英桂迅籌妥辦總期聲勢聯絡不可稍分畛域儻任聽逆匪偷渡北竄朕惟該督撫等是問

上諭內閣曰據舒興阿奏本月十六日夜廬州郡城失守江忠源在水西門內禦賊陣亡等語江忠源以知縣調赴軍營屢立戰功超擢臬司令其幫辦軍務本

年在江西守城尤爲出力倍著忠勤旋卽授爲安徽  
巡撫由湖北力疾赴皖甫抵廬州卽值逆匪圍攻郡  
城督率文武紳民兵勇竭力守護一月有餘屢次出  
奇制勝力捍危城方資倚畀乃因援兵不力以致賊  
陷廬州捐軀盡節深堪悼惜江忠源著追贈總督卽  
照總督陣亡例賜卹入祀昭忠祠任內一切處分悉  
予開復應得卹典該衙門察例具奏並著於殉難地

方建立專祠以慰忠魂舒興阿統帶重兵旣已行抵  
廬州不能督兵竭力救援又不遵旨撥兵交和春統  
帶調遣以致郡城被陷蓋臣捐軀實屬辜恩大負委  
任著卽革職帶罪自效和春自徐州赴援帶兵無多  
所有舒興阿管帶之兵卽著和春統帶各路援兵均  
歸調遣務當督率鎮將激勵兵勇迅圖克復郡城毋  
稍遷延

同日福濟奏言臣於初九日自清江起程因急  
欲赴援廬州將兵勇分起前進無如經過地方  
凋敝異常夫馬不能敷用屢催罔應於十八日  
甫抵臨淮關分走湖路兵四百名到僅及半自  
因風色不順所致心急途遠焦灼萬分俟到  
齊卽當星速前進聞廬郡賊勢鷓張府城七門  
均有賊壘東北情形甚形喫重臣當隨時相機

迅圖進剿奏八

上命軍機大臣傳諭福濟曰本日據舒興阿奏逆匪攻陷廬州江忠源殉難已授福濟爲安徽巡撫著卽帶兵前往會同和春合力攻剿一面克復廬州一面遏賊紛竄萬勿遷延致干重罪

二十五日 乙未舒興阿奏言 臣現在帶兵駐紮之

岡子集並楊青鶴郝光甲所駐之高橋等處均

在廬郡西北距賊巢八九里及十餘里不等現  
經督飭官兵兩次進剿雖均有斬獲祇以兵力  
過單一時斷難得手當此攻剿喫緊和春咨撥  
之兵未便令其調往東北四十里店埠地方致  
與音德布諸軍聲息隔越現已飛咨和春迅卽  
前來以便就近交兵統帶進剿前准江忠源自  
城中來咨以賊匪由湖北分股竄擾英山情形

危急囑臣撥兵馳往六安州協同防守臣已分兵五百名同張印塘撥出募勇五百名先行馳往六安防守其餘撥定官兵二千五百名俟和春到來應卽交給統帶臣卽帶領官兵一千餘名遵

旨馳往潁州一帶籌防奏入

上命軍機大臣傳諭和春曰舒興阿所帶兵勇昨已有

旨全歸和春管帶調遣此時皖省情形總以迅復廬州嚴防北竄爲要現在兵勇亦不爲少該提督自應迅籌進剿若專顧堵禦俟琦善向榮撥兵到後再圖進攻恐逆匪久占廬州又成負嵎之勢舒興阿應否仍赴穎州抑派往他處要隘防堵著和春酌量調遣需兵若干卽由該提督分派仍歸節制以一事權其自楚竄擾英山之賊如何截其來路使之不能連結



均著妥籌辦理

二十六日

丙申

安徽巡撫福濟奏言查揚州東路

潛標兵三百名河標兵二百八十名本歸臣管

轄屢次接仗斬獲甚多前由揚起程時兵弁齊  
聲情願隨往殺賊立功因儀徵甫經失守逆匪  
屢窺三汊河斟酌緩急情形不得不暫留揚州  
以資防勦現聞揚儀先後收復賊趨南路灣頭

自應撤防况琦善等統兵萬餘皆強幹之師足資調度清河兵弁留營不見其多不留並不見少臣馳抵臨淮關相機籌辦廬州之圍未解固應星速赴援廬州之圍卽解亦須窮追進剿所帶兵止六百名新募之勇甫歷戎行深恐未能得力如得舊隸之兵作爲前驅迅圖勦滅不獨臣收指臂之助於皖省全局實有關繫應請

飭下琦善慧成雷以誠等卽令段應元吳慶孚將漕河  
兩標兵五百八十名檢齊軍械迅速起程赴皖  
以助攻剿

福濟又奏言臣途次接袁甲三咨文因臨淮緊  
要留臣駐守防堵業經具奏自應聽候

諭旨何敢妄瀆惟管見所及亦不敢自安緘默致誤事  
機夫臨淮爲徐泗門戶廬州又臨淮門戶藩籬

固則堂奧自安自是不易之論查廬州七省通衢形勝之地從古所必爭現在大股賊匪四面環攻雖經江忠源等固守從未大受懲創揚儀餘匪更恐窺伺天長冀圖會合情形十分喫緊賊以全力注之我亦以全力應之方爲制勝之法通盤籌計實宜先其所急迅速赴援至於臨淮一帶必須妥爲布置臣親詣河干查看地勢

曠野平原無險可扼擬如袁甲三等所議於北岸多設營盤聯絡一氣聲息相通沿河船隻均不准泊南岸以防暗度已札飭舉人臧紆青管帶壯勇一千名會同署廬鳳潁道立誠知府裘寶善和衷商辦一體嚴防臣惟有激勵兵勇進接廬州以靖逆氣而全省會奏入

上命軍機大臣傳諭琦善曰現在皖省情形緊急福濟

所帶兵弁無多揚州既經解圍東路已有重兵扼守  
所有紮營該處之漕河標兵向隸福濟麾下調遣較  
爲得力著琦善迅飭段應元吳慶孚檢齊軍械管帶  
起程剋期馳赴安徽交福濟調撥如現在撥防衝要  
處所卽可不必調動至前降旨令琦善於揚州軍營  
內飛速撥兵四千名飭令薩炳阿統帶趕緊前赴安  
徽歸和春節制此項兵丁必須迅速派往不得藉詞

請留致誤事機

二十七日

丁酉

僧格林沁奏言逆匪占踞獨流靜

海復又分賊在獨流靜海之間五里莊地方築成木壘竟成三窟之勢且據拏獲奸匪供稱該逆將官兵失去礮位安放木城之內是該逆壁固壘堅連得利器足資抗拒現在東西兩面日夜開礮轟其巢穴該逆堅匿不出連日總未接

仗近獲由賊營逃出之人供有逆匪婦女扮作  
乞丐往南乞援並南省之匪二月可到等語雖  
似逆匪捏造之言未足盡信然總宜迅速藏功  
方免他慮奏入

上諭曰逆匪情形實非窮蹙汝前奏一俟冰堅即可進  
偏火攻已隔多日並未見續奏是否得力是何攻法  
再據汝所聞有何可乘之機著一併據實密奏



同日張芾奏言臣前請留滇黔銅鉛銀兩欽奉諭旨屢次嚴催不准截留何不知緩急置全局於不顧

等因臣伏讀之下恐懼悚惶莫能言喻竊查江西省城本年五月間被賊竄擾閉城之日藩司糧道兩庫共存銀五十餘萬兩至八月解嚴之日用存銀不滿十萬兩因安徽撫臣江忠源等帶兵赴楚給發一月口糧共用銀五萬餘兩存

銀無多愈形支絀原擬俟陸續徵收及勸捐等項稍資應用乃因水災兵燹後催科竟無起色勸捐亦屬寥寥總緣賊氛尙近商民多未復業一切不能周轉是兵民交困不特全局可憂卽江西一省已有不可終日之勢據藩司詳請將應撥雲貴銅本鉛本等項奏請截留銀三十五萬兩實因無款可籌暫爲騰挪並非有現銀存

庫欲請留用也現在寇患未平江西一省本係  
自顧不暇卽稍有餘力尙須協濟鄰省所有雲  
貴銅鉛等項銀兩萬萬不能籌撥查運道未通  
銅鉛亦不能北上可否暫停採買其雲貴二省  
兵餉或令該省自行勸捐籌辦伏候

聖裁 臣 至愚極陋過蒙

委任遭遇時艱每形隕越辜負

鴻慈汗顏無地

皇上責以一籌莫展庸愚無能臣無所逃罪至昧良喪  
心臣雖不肖萬不忍出此亦不敢出此也抑臣  
更有請者現在

宵旰焦勞臣工或未必盡能仰體而

訓諭誥誡之時

聖心自有權衡則受者知所做惕聞者罔不懍服此尤

臣區區之忱不僅爲一身計也奏入

上諭內閣曰前據張芾奏請留滇黔銅鉛銀兩朕因其不知緩急任意截留保舉守城各員太覺冗濫是以於批摺內嚴旨切責正望其激勵有爲兼籌全局庶不負朕諄諄訓誨之意乃本日據奏籌撥軍餉摺內不知感愧仍復曉曉置辯張芾係內廷翰林會司部務由學政特簡巡撫值此軍務方殷籌餉孔亟之際

應如何酌度緩急詳慎舉劾於奉到諭旨時虛心體會爲朕分憂乃據所奏但以庸愚引咎轉視訓諭爲多事實屬負氣妄言有負委任張芾著交部議處

二十八日

戊戌

英桂奏言准安徽撫臣江忠源咨

會六安州屬之英山縣有賊匪由湖北分股竄擾情形危急飛咨嚴行防堵臣查豫省之光州固始均與六安州一帶毗連防堵極爲緊要前

經咨催南陽鎮臣柏山帶兵前往駐紮計期卽  
可到防臣本擬俟新任南汝光道余炳燾到任  
後卽行前赴汝郡以爲光固聲援現聞楚北逆  
匪大股俱竄下游其黃州盤踞之餘匪經湖廣  
督臣帶兵追勦自可就近掃除豫省信陽州之  
武勝等關俱已派兵嚴守余炳燾到後卽飭其  
督率巡防可期周密臣酌帶兵勇卽往汝甯駐

紮居中調度爲鎮臣後路策應以固光州等處  
邊防奏入報

二十九日己亥琦善奏言查儀徵甫經克復老河

影等處尙有賊船停泊必須嚴加防範當卽派  
委通永鎮總兵李志和等帶領官兵前往儀徵  
駐守並時赴江岸巡哨賊船停泊江中見有官



兵不敢登岸旋即陸續開行其樸樹灣之南北兩岸暨東西石人頭凍青鋪等處之賊早經擊散並經德興阿將南岸民房逐一搜查並未見有一賊又據六合縣知縣溫紹原稟稱本月十七日有賊船五十餘隻自金陵觀音門駛至江北賊匪數百名上岸焚掠該處俱係圩田窄埂且隔河兩道溫紹原用船支搭浮橋守備秦懷

揚率領弁勇爭先過河殺斃賊匪百餘名副都  
統德崇額督率馬隊並外委王兆湧帶勇馳至  
擊斃多賊餘匪俱驚遁回船秦懷揚等奮勇追  
勦將擡礮火箭擊沈賊船二隻賊匪溺死者無  
算其浦口地方自武慶等擊賊獲勝後連日未  
有警報是江北儀徵六合浦口現均一律安靜  
其瓜州賊船均已遁回金陵未聞北竄之信惟

瓜州賊巢既有甌城一座該逆日夜增高培厚  
又有土城木城相爲犄角四面挑挖濠溝引江  
水以貫注其河路亦釘椿木官兵連日攻勦未  
能得手現在陳金綬已移營三汊河東岸之桂  
花莊東南連營三座宣化營又居其東總兵多  
隆武移營養生堂俟六合浦口助勦之兵撤回  
徐州鎮之兵添馬步隊營盤數座卽可連潘家

橋施家橋一併防住曩騰龍德興阿在三汊河西岸扼其中路臣移營至揚州秦家橋西南地方該處距樸樹灣新集僅數里通儀徵之陸路賈家樓二里水路之東西石人頭凍青鋪四五里三汊河約八九里實爲控扼瓜州儀徵水路之要

琦善又奏言和州爲皖省濱江要地距浦口祇

隔一百餘里前派副都統常清帶兵八百五十餘名在該州之烏江駐紮方虞兵力不敷近據該副都統呈報因該省廬州緊急咨調赴援業已起程查和州在金陵西北相距不遠賊船沿江上下該州曾經兩次攻陷而所屬之裕溪口尤爲熟徑今將防兵調撤雖係爲援應起見但恐賊船乘虛駛入未免顧彼失此皖豫地勢毗

連處處可以北竄似宜嚴密防維

同日雷以誠奏言前月二十六日馮景尼等近城各營勇潰之時將東林寺千總孫得富分帶之勇衝動離營者二百餘名臣營萬福橋及黃泥溝沙河橋等處並無潰散情事且有拏獲逃勇及放火奸細數十名均經訊明正法惟自馮景尼各營勇潰之後琦善愈以爲勇不可恃並

稱奏明令將各勇全行撤去及奉

諭旨有撫綏激勸各勇並扼守萬福橋隨時相機接應  
之語仰見

皇上洞燭形勢權衡輕重欽佩莫名特臣此時若不將  
勇裁撤是違琦善節制也若竟全行撤去是不  
謹遵

諭旨也臣實進退維谷靡所適從現查捐輸之項日形

竭蹶餉需實難爲繼反復思維惟有於現存各  
勇四千八百名內酌減二千三百餘名陸續妥  
爲遣散其餘二千數百名暫行扼守萬福橋並  
分駐霍家橋等處及看守捐輸支發火藥軍裝  
等局仍一面照前摺所請力行堅壁清野之法  
俟地方漸臻安靖臣必將各勇漸次裁汰以節  
糜費特慮撤之太驟無論散遣不易且東路頓



身之耳目之口  
三十一  
覺空虛於刻下情勢似不相宜均奏入

上命軍機大臣傳諭琦善陳金綬雷以誠慧成曰琦善奏稱瓜州賊船均已遁回金陵未聞北竄之事是否確實設安徽沿江一帶又有警報豈得以賊船已返金陵遂謂非瓜州大股意存誘卸已屬顯然卽常清之兵遵調赴援廬州豈能再令折回和州旣與浦口相近琦善仍應撥兵設法嚴防何得虛言搪塞豫爲

站脚地步廬郡係北路咽喉逆餒狡獪殊甚儻或覲  
覲北來事勢何堪設想琦善身爲總統設有疏虞惟  
該大臣是問至瓜州賊匪業已築壘堅守若不及時  
攻克又成負嵎之勢萬一復擾揚州及儀徵等縣琦  
善將何顏見朕耶雷以誠前募鄉勇旣不足恃自應  
裁汰其現存各勇二千餘名亦未便全行撤散仍著  
雷以誠管帶約束以助兵力據琦善奏稱亟須向前

移營應如何分撥布置仍著妥籌辦理總之揚州儀徵賊匪均係自行竄去固因勇潰所致亦並非兵力驅除此時惟有併力急攻瓜州嚴防北竄稍贖前愆

同日

上命軍機大臣傳諭僧格林沁勝保曰朕因靜海獨流賊匪負嵎日久疊次切責勝保迅速剿除乃遷延三月尙未奏功且南軍失利大股逆匪蟻聚廬州其覬

覷北竄之心焉能保其必無非將此股先行鏟除不  
足以寒南中賊膽該逆全踞東面勝保之兵亦多向  
東面攻勦而獨流至靜海五里莊地方又有該逆木  
壘必須重兵分路圍勦奪其隄堦斷賊南北救援之  
路方能得手祇有僧格林沁駐軍王慶坨離賊營三  
十餘里相距較遠不如歸併一處以壯聲威著僧格  
林沁卽日統兵前進與勝保會合籌攻所有該參贊

大臣營內之三盟官兵及培成綳闊那敷德等所帶馬步各隊均可酌提歸併前路至伊勒東阿史榮椿所帶之兵或令前進或應仍留王慶坻駐紮均著妥籌布置僧格林沁自出京後並未與賊接仗趁此久蓄威聲必可掃數殲擒若再有耽延何顏對朕僧格林沁抵獨流後應於何處駐紮或會攻獨流或分攻何處務須與勝保和衷商榷朕必不爲遙制總期剋

日將獨流靜海與五里莊賊匪盡數剿滅萬不可令賊竄逸再滋延蔓

上諭內閣曰逆匪竄踞靜海獨流已將三月勝保統領各路大兵四面環攻屢據奏稱賊情窮蹙已甚總未能掃穴擒渠勝保督師日久無功能無自愧僧格林沁現在駐兵王慶坻著卽統帶馬步各隊移營前進與勝保合爲一軍併力進剿務將逆壘一律掃除不

准互相推諉勝保若因派僧格林沁前進遂存卸責  
之見國法具在豈能寬貸諒該大臣等斷不敢各存  
意見再事遷延也